



La Chasa Editura Rumantscha (CER) exista dapi il 2010. Ella edescha publicaziuns rumantschas en tut ils idioms ed en rumantsch grischun, per uffants e creschids; e vegn sustegnida da la Confederaziun, dal chantun Grischun e da la Lia Rumantscha.

La chasa editura per il rumantsch

Dapi 5 onns datti la CER cun las localitads da biro a Cuira ed il logo che regorda tant ad in cudesch avert sco er al bustab «R» per rumantsch. Dapi in onn ha la CER duas collavuraturas: Anita Capaul e Karin Kohler-Pattis. Dunna Kohler è responsabla per las ediziuns d'uffants e giuvenils ed ha ina gronda experientscha en questa sparta, dunna Capaul surveglia las ediziuns per creschids ed ha la responsabladad dal tetg finanziel da la chasa editura.

La CER porscha servetschs d'ediziun professiunals per nossas auturas e noss auturs, damai bunas cundiziuns da produziun, vendita e promoziun. Fin uss ha la CER edì 27 cudeschs da tut gener, en tut ils idioms e rumantsch grischun, bilings, per creschids e per uffants e giuvenils, cudeschs auditivs ed e-books.

Per la decisiun dals texts che vegnan publitgads datti duas cumissiuns: il cussegl d'ediziun da tschintg personas per la sparta da litteratura per creschids (Renzo Caduff, Roman Caviezel, Annetta Ganzoni, Rita Uffer e Bettina Vital) ed ina segunda cumissiun da trais personas per decider davart las publicaziuns per uffants e giuvenils (Olivia Pfister, Annalisa Schaniel e Barbara Strebel).

La purschida da la CER sa differenziescha tar mintga project da publicaziun. I dat auturs ch'inoltreschan la versiun da text elavurada gia fitg bain, per part gia lectorada. Alura datti auturs che s'annunzian cun in'idea per ina publicaziun ed i vegn elavurà ensemen in concept da l'ovra, defini ils pass da lavur, ils termins e las personas d'accompagnament. La chasa editura surveglia ils pass da produziun e fa la communicaziun dal nov cudesch sur ils meds da massa, organischescha ina vernissascha e pliras prelecziuns en differents lieus e procura per la vendita.

La CER tgira il contact cun scripturas e scripturs rumantschs ed ha ina buna rait da contacts cun editurs externs ch'è sa sviluppada tras differentas traducziuns dad ovras da la CER en autras linguas.

Il basegn d'ina chasa editura è sa confermà tras ils texts inoltrads, sco era tras las numerusas dumondas per cussegl en connex cun cudeschs che na vegnan betg edids da la CER. Auturas ed auturs, uniuns ed auters organs che lessan edir ina publicaziun vegnan regularmain cun dumondas tar la CER, uschia che quella ha er ina sort funcziun da post da consultaziun per ediziuns – e sa legra da mintga nov contact cun personas che scrivan, lessan scriver u han in text u in'idea per ina publicaziun.



Anita Capaul e Karin Kohler-Pattis, las collavuraturas da la Chasa Editura Rumantscha.